

# Iems

## Iems letawa sumanailala mampo girumalena

<sup>1</sup> ✧ Niapo sosona! Ne Iems e uduudu auwaledina. Nuaeuwa e manlawo! Ne ipa God ita Tatamba Iesu Keriso nolau dewalala. Ne leta ema girumantedina e sumanai sosona tawo bolawa daitada apanawa bedeuwo wainilana manlawo.

*Poka daitada bedewee sumanaimba badolepi*

<sup>2</sup> **Sumanai sosona, e poka daitada donsanne mai insaisala omepi, dia! Tane poka sa baiwa e nuaeuwana!**

<sup>3</sup> God e sumanailala poka isiwa enaledia mampe wadaetaledede. Tane e ateiten, naita poka sa bedewe e sumanaila mai eipona, sa ipa e muka wadaidasailana sumanaila bedewe badowa enonune poka saiwa iompo awanenune nanausanuna rua os.

<sup>4</sup> **Tane e walama uduudu sumanaila bedewe badowa enonune poka iompo nanausanuna e sumanaila bedewe initane badoitana.** Tane sumanaila bedewe badoitana e wanwanla bedewe dodomanaida wanlempa God menasadia ruawa, ita do mai wawu da bedelawo winepi, diaida.

<sup>5</sup> Tane apana da e bedelawo aten insaisawa euwa me mampe mai wineipona me God iririsapi aten wanepia baiwa. Ita God me aten insaisawa wanepi. Me mida iririleidia God mai etepie

---

✧ **1:1:** Matiu 13.55; Mak 6.3; Aposel 15.13; Galasia 1.19

dabuasapie onawa wapiama, dia. Me apana udu-udu nuaeuwa mampe debamasadie wanamode.

**6 Me mida iririleidia mai ingugura do iririlepi, dia, tane me sumanaiidalepi God me iririwa ideita sipoasapie wanepi, mai dabuasapie epi.** Ipawa apana mida ingugura do iririleidia ipa owa rauwanagawa lanunu epedio leusaituledia ruawa.

**7** Apana mida epe dewalempa mai raupariwa sipoa onioniawalempa, ipawa Tatamba me raupariwa mai sipoasapiama, dia.

**8** Apana sa ipa kainokaino insaisawa leusaitusade, me insaisawa natantoio baiwa walama uduudu bagoraidaleide.

*Sumanai apanawa nuaparelala ita mauralala wasaubu gagalowa*

**9** Sumanai somba nuaparelala God mampe ionoidolena baiwa meba asowa wampa.

**10** Ita somba da mauraleidia mai maurawa asowa wampa, dia. Tane me nuawa aiaisiwa di daina waimpe insempa ina kelowa tauwadea os nonosintoie diaidantoia ruawa me bolepi.

**11** Omo wisedie tontaleidio polaida wade ita ina idie kelowa roroleidie nosedituwade ita ina euleidia dialen. Deawaa, apana mauraleidia nolawa uduudu dewamodia bedewe me bolepi.

*Rubu nainta iedia gagalowa*

**12 Nuaeu debamaia me mampe mida poka daitada mampeleidio sumanaiwa bedewe badowa enedia God wadaetasadia walamawe.** Me nuaeulepi, ipawa me wadaeta sa nanausapio God unewa eudida inawinakasalala

wanepi. Une sa God saualena mo mida me nuawadawadamodia wadapu.

<sup>13</sup> God apana poka daitada mampe sumanaiwa wadaetasampo me kadi dewawa insempe mai insakoalepie wapiase, “Ema ipa God ne rubunedia kadi dewasapaa baiwa.” **Mai mida da God rubusapono kadi dewasapona rua, diaida! Ita me mai apana da rubusaipona kadi dewasapia baiwa, dia.**

<sup>14</sup> **Tane apana meba insaisawa kadiwa nuawa bedewe wineia rubu osowe itude. Me nitu da anaanala ewedie nuausadio kadi dewawa insede.**

<sup>15</sup> Apana mida insaisa kadiwa insaisawaleidia ompawa ipa kadi dewasade. Ita me mida kadiwa dewasampa ipawa itudia ipa bo.

<sup>16</sup> Nuana sosowa, mai eba lagaitane insenase, “God ne rubunedia kadi dewasapa.”

<sup>17</sup> God ipa sapa mamba, sapa uduudu me dewamon. Me mai sapa ita dubawa dewawa natamoipe dewamoipona, diaida. Tane me ipa deawaa bumpe odena wande. Ita apana amonau eubu os God mampe wadei.

<sup>18</sup> **Me ulaipa gagalowa no baimba ituna bedewe ina intawaida euwaneno ewatana. Ita inta sa mampe no ina sanaa nenen me insaisawa rua.** Me epe dewalena, ipawa me menasana dewa uduudu segamona bedeuwo no debamaidantepona.

*God aiawa etonte ita eueuwa do dewasantaa gagalowa*

<sup>19</sup> Nuana sosowa, ema wapo insenadewaitana! Ema epe: **E deadea uduudu gagalo deaitopa**

**asisudewaitonuna asisu dewala apanawa rua. E gagalo baiwa mai diniwaitane gagaloitana, bauta insenadewaitane muriwa wana!** Ita e mai nuala tauwadea os kadilepio wano nosepi, tane dainaitane nuala anaten!

<sup>20</sup> Ne ema wadina, ipawa apana nuawa kadileidia mai dewawa dodomana dewasaipona God menasadia rua, dia.

<sup>21</sup> Sa baiwa **irai apanawa iraiwa deuleidia rua deawaa mira ita kadi uduudu e manlawo wineia otawiaitana. God aiawa e bedelawo aimodia winei, sa ipa e inalepia ruawa. Aia ipa sa nuala obasa euwa mampe etonune manlawosanuna.**

<sup>22</sup> Tane mai eba insenunase, “God aiawa eteitana mampe inantata.” Sa ipa eba lagaitilana, ipawa **etaetawa os mai rua, tane e God aiawa etonune ruawaitane eueuwa do dewasanuna!**

<sup>23</sup> Apana God aiawa etedie tane mai ruawaleipe dewasaipona me ipa apana mida garasi bedewe inainamba ewedia ruawa. Me inainamba ewedie meba etepa simbiawa insede.

<sup>24</sup> Tane inainamba ewedio dialeidio edie aleidie dima garasi bedewe ewena mai inseipona, nuawa awawaleide. Apana epe dewaleidia garasi ewedia mai sausapia rua, dia. Deawaa, **apana God aiawa etaetawa os etedia mai sausapia rua, dia.**

<sup>25</sup> Tane apana mida inaida gagalowa euda deaitopa asisudewaleidie, dima etedia mai nuawawasaipona ita nuawa bedeweido itudio winedio eueuwa do dewasadia, God apana sa dima uduudu dewamodia sausadie euwa osowe itude. **Inaida gagalowa euda ipa God**

**anaanawa sanaa no inanedie kadi taiwa lo-todiaubedie euwa oso itunedie ita God insaisawa nenedie onianede.**

<sup>26</sup> Apana mida God simbiasadie insediase, “Ne ide rua dodomana os simbiantedina,” tane me epawa mai onieipadewaleipona, sa ipa me simbi-awa meba ipasiasade, God mai menasaipona. Me di simbialeidie ita meba insaisawa banlakadisasade.

<sup>27</sup> Tane Mamamba God simbia nolawa euda ipuipua ita dodomana os menasade. Me menasadia nolawa dewala ema epe simbialempa: Me suweibu ita obuobu dima menamodia mampe saumompe oniadewasamompa ita apana insaisa kadiwa dewalala me mai ewamopie wauwolepie mo kadiu dewasaia rua dewasapie miramiralepi, dia.

## 2

*Mai mauralala os sowanamonune, tane nuaparelala emonuna!*

<sup>1</sup> Sosona, e Tatamba Iesu Keriso sapaida bumpa ionoido wandia sumanaiwalala. Sa baiwa apana uduudu mampo deawaa dewanuna, mai mauralala os sosola wanamone manlawomonuna, tane nuaparelala ewadabuamonune emonuna.

<sup>2</sup> Ne waeuwa ema wapo insena: E God aiawa etaetawa baiwa auweipono bedelawo apana nata odapona. Dea garawa eubuida taumope ita rin gold mampe dewalala witape aimope odapona. Tane sowa da nuaparelala garawa kadiwa pumpumba taumope odapona.

<sup>3</sup> Ita apana mida garawa eubuida taumone odena e nuala uduudu mampe auwasape wadape

manlawosapona. Ita apana dea e bedelawo me diape waponase, “Sona wine, wanwan bolawa eudida ema eboeboua waimoia bolau osowe wana!” Tane nuaparelala diape waponase, “E nambe eseanaita enona, ba no adimbo wana.”

<sup>4</sup> E auweipe bedewe epe dewaitapona, sa ipa empuempu dewawa dewasapona, ita e insaisala kadiwa mampe apana maurala sola wanasapona, tane nuaparela ewadabuasape epona. Sa ipa e kadiwa dewasapona.

<sup>5</sup> Nuana sosowa, ema wapo insenadewaitana! E ateiten ba dia, **mo mida tawo osowe wanwanlala apanawa ewamoie inseia mo ipa nuaparelalaida, God apana sa sonabamono me apanawaida wananton. Me mo sonabamona sumanaibu bedewe debamantopue maurantopu ita me gonaawa bedewentopue wankasantopu.** Sa ipa God mo mida me nuawadawadasaia sauamona rua.

<sup>6</sup> Tane e nuaparelala ituaisimoile wareuwamoilana. E ateiten apana mauralala eboeboua mo ipa e wanwanla kadiidasai. Mo ipa e muka do dialeie banlaleia kotu apanawa mampe wileno kotulepia baiwa.

<sup>7</sup> Ita mo ipa sa, mida ebowa eudida ionoidoa mampee inaitena wakadisasai.

<sup>8</sup> ✧Naita e wareremba God anaanawa dea debamawaida buka bedewe girumalena winedia ruawaitile dewasailana, sa ipa e dodomana euda os dewasailana. Anaana ipa girumalena ema epe wadi wadiase, **‘Soa tanawoa nuawadawadasaa e eba nuawadawadaitiana rua.’**

---

✧ 2:8: Liwai 19.18

9 Naita e apana maturalala os nu-awadawadamoile tane nuaparelala ewad-abuamoile emoilana, sa ipa kadiwa dewasaile anaana ampuiasailana.

10 Apana mida anaana uduudu ruawaleidie tane bedewe dea os edia, sa ipa me kadi de-wasadie anaana uduudu ampuialeide.

11 ✧Ipawa God mida wane wanase, “Mai ni-naitaa,” do wanase, “Mai bosaa.” Naita e mai ninaitipona tane apana da epeiabileidia, sa ipa e anaana ampuialala.

12 God e anaana sanaa dima no inanedie kadi taiwa lotodiaubedie euwa oso itunedia asiasi kotulepi. Dima uduudu wanune do dewasanuna bedewe ema insena.

**13 Ne epe wadina, ipawa apana mida sosowa mai nuapareuleipona di badoleidie wandia, deawaa God me kotusampa walamawe mai nuaparewalepi, dia. Tane me mida sosowa nuapareuleidia mai God kotuwa sawalepi, dia.**

*Apana sumanaibu eueuwau mampe sabamolepi*

14 Sosona, apana da wapiase, “Ne Iesu Keriso bedewe sumanaintedina,” tane sumanaiwa sa mai eueuwa oso ituipona, me di sumanaileide. E inseilana sumanai inainamba epe rua me inas-  
apia rua, ba?

15 Ne waeuwa ema wapo insena: E sumanai sosola isiwa garau ita nanau dia waimoi.

---

✧ 2:11: Ekisod 20.14; Ekisod 20.13

<sup>16</sup> Ita e bedelawo apana dea mo diamopie wapiase, “Euda e manlawo, ala euwa os aitana! E garala ita nanala osowe badowa wanlempa!” Tane me mai nitu da mo abolawantoia wanamopona, dia. Aia sa os wadia euwa dima mo mampo?

<sup>17</sup> **Deawaa, sumanaimba bedewe aia os waitana tane eueuwa dia, sa ipa sumanai bobopa.**

<sup>18</sup> Tane apana da waponase, “God amona daitada apana wanamode, mo isiwa di sumanaintompa ita isiwa sumanaintompe eueuwa do dewamompa.” Ne me sipoasape waponase, “E sumanaitiana, tane sumanaia eueuwa mai dewasaipona, dia. E sumanaia sa euwaneawo ewapo dima rua? Tane ne sumanaintedina eueuwa dewamodina euwaepo bedewe sumanaina ewaa rua.”

<sup>19</sup> E sumanaitiana God dea os wande. Sa ide, euda! Aleu kadiu mo do ema sumanaiwantoi, ita mo God sawaidantoie uwauwantoie waimoi. Mo bedeuwo sumanai winede, tane God aiawa mai ruawantoipona baiwa santoie waimoi.

<sup>20</sup> **E ambi mai atendewaitipona e aia os mampe sumanai ebowa waiana, tane eueuwa dia, sa ipa diapanaida, mai rua!** Ne buka bedewe winedia ewape waeuwadewasaepo ateitaa, ba?

<sup>21</sup> ✧ No nosimba Abraam ambi God mampe dodomanalen? Me otopa Aisak wadene pulo ituia watawa osowe pulo rua itun. Eueuwa ema dewasane ita God mampe dodomanalen.

<sup>22</sup> E eueuwa ema ewale ateiten, ba dia? **Abraam dewa nata wadadomon: Me God bedewe sumanaileidie do dima God diena**

✧ 2:21: Bumpai 22.1-14



**ruawa eueuwa dewamodie. Me God dima diena simbiawalena baiwa me sumanaiwa badoidalen, ita God ewena me sumanaiwa ipa dodomana os.**

<sup>23</sup> ✧ Dewa ema segalena dima buka bedewe girumalena ulaipalen. Buka wadi wadiase, “Abraam God sumanaiwalena baiwa God me umanawa wane wanase, ‘Abraam ipa dodomanaida.’” Ita God Abraam ebowa wane wanase, **‘E ipa ne sonaida.’**

<sup>24</sup> Tauma e ewale ateiten, mai mida sumanaiwa os bedewe God mampe dodomanalepia rua, dia. **Tane mida sumanaiwa eueuwa dosadia me ipa God mampe dodomanalepia rua.**

<sup>25</sup> I ninala ebowa Raab God dima diena ruawa dewasane Iosua apanawa waaubamona di-amone banlamono duwa bedewe odeiena ita do inta dewasana weregainta antopua baiwa. Raab eueuwa ema dewasana mampe God mampe dodomanalen.

<sup>26</sup> Apana bedewe nonau dia, sa ipa ete bolala, deawaa sumanai mai eueuwa dola ipa bobopa.

### 3

<sup>1</sup> Sosona, e bedelawo isiwa os God aiawa waeuwa apanawa wanaitana, ipawa e ateiten God no waeuwantitana apanawa badowaida kotunepi, mai apana isiwa ruau.

<sup>2</sup> No uduudu dewa isiwa bedewe omeitana. **Tane apana mida walama uduudu gagalowa dodomana os wadia, me eudida dodomana os wande dewa uduudu dewamodia bedewe, God menasadia rua. Ita apana epawa**

**oniedidewaleidia, me ipa rua os walama udu-  
udu etepa do oniede.**

<sup>3</sup> Ne waeuwa ema wamopo insena: No pue oas dewasapono inta ruawalepe naepe no a menanediawo alepona baiwa ema epe dewasaitana: No oas moawe tai tautana ita tai ipa sa mampe wadadontite teineitana banlanedio antitana. Ita tai sa kerauda teineitana mampe pue sa debamawa ruambaleide.

<sup>4</sup> Waa kukakuka debama insena. Waa sa uamo aleidia lanunu debama os supiaubepio alepia rua. Tane waa awa dodomanasampaa apanawa waa dodomanasapia wolewa keraudaida mampe dewasadia waa naepe me alepia menasadiawo rua alepi.

<sup>5</sup> **Deawaa, epamba ipa keraudaida, tane kadi debamaia dewasapia rua. Ita e ia idia insena. Ia epawa dea keraudaida, tane rua os dobina debama ipituwapi.**

<sup>6</sup> Etemba uduudu bedeuwo epamba ipa kadiwaida, me etemba uduudu miramirasade. Epamba ipa irai debamaia tawo bolawa uduudu bodedia rua. Irai ipa sa bedewe kadiwa uduudu inintoi. Tane do epamba ia idia rua. Ia idia sa bumpa ipa ia iikasalalawo ine debamalen. Ita ia sa muntena walamawe ita ompa osowe no bedembo iikasalala.

<sup>7</sup> No pue uduudu dobinoa, ita owa bedewe wanwanlala, do iono laia uduudu otete manasamotaa rua.

<sup>8</sup> **Tane dea os no epamba, sa ipa pue onawaaida mai manasalala rua. Mai apana da me epawa oniepidewalepia rua, diaida.** Epamba ipa kadiwaida teparebarebaleide, mai

walama da di wineipe bubualeipona, dia. Ita moambo imada rua nosedie apana kadimode.

**9 ✧ No moamba mampe God no Tatamba ita Mamamba wadaposisaitana. Tane do moamba mampe apana mida God inainamba rua dewamona wakadisamoitana.**

**10** Moamba ipa deawaa mampe wadaposintitana ita do wakadisantitana. **Sumanai sosona, dewa ema e bedelawo mai segalempa, dia!**

**11** Ne waitarana isiwa dialepo insene mampe aten wadana. E inseilana maneu nanala euda bedewe esa sigasigaua do nosede, ba?

**12** E korou iawa osowe waita ipawa aisamona rua, ba? E inseilana wain iawa osowe korou ipawa naude, ba? Sa dia! Esa kadiwa weuwadia bedewe e mai esa euda utana rua, dia. Tane apana moawe ambi euda ita kadiwa nosepi?

*Aten nata, da God mampea ita da Seitan mampea gagalou*

**13** Mo mida e bedelawo inseia mo atembuida insadewasala, mo ipa wanwan euda os waimompaa bedewe aten sa eueuwa sabamosaipona. Do insaisau aiaksiwa dewau euwaida dodomana sosou mampo dewasaipe mampee atembu sabamosaipona, sa ipa ulaipa atemba eueuwa.

**14** Tane naita e sosola mampo dima euda ewonune nuala pola wadia e wadapona, do e eba debamaitonuna insaisawa os insenuna, sa ipa e mai di segarala wane wanase, “No ateinimbaida, insadewasalala!” Sa ipa di segarakoaitile, ulaipa intawa lagawa wailana.

<sup>15</sup> Dewa ema nata dewamonuna, sa ipa mai God atemba e enalepona, dia, e aten da dewamoilana. Tane dima ewonune nuala pola wampa ba deba-maitonuna insaisawa insenuna, sa ipa tawo ema ita ete insaisawa kadi mamba Seitan mampee iede.

<sup>16</sup> Naita apana auweia bedewe dewa ema nata segantompa mo oniamoia apanawa aiau mai ru-awantopu, ita nolau rebarebalepio koakoantopu, do dewa kadiwa daitada mo bedeuwo segantompa.

<sup>17</sup> Tane mo **sumanailala mida God atemba insaisawa euda wadeia mo wanwambu dodomanaida kakaiwa waimoi. Mo nuau aiaisiwa os sosou do waimompa, ita mo sosou da insaisau do wadompa. Mo walama uduudu sosou nuapareuntompe saumompa, ita do dewa eubu os dewamompe naunau euwa naumpa.** Mo mai lagawaa, tane ulaipa os dewalala apana mampo.

<sup>18</sup> Mo ipa sosou seuseuantoia dodomanamoia deantopua baiwa. Mo ipa irai apanawa ruau, mida lawuru naumba euwa aneio naudio ipawa uwauwantoi, sa ipa wanwan dodomana euda segaleidie debamaleide.

## 4

*Mai tawo ewanuauwa daitada nu-awadawadasana!*

<sup>1</sup> Dima baiwa e sosola do wawaitile ita do on-aitilana? Dewa ema nainta iedia dewamoilana? **Bumpa ipa e nuala bedewe winede, sa ipa ewanuau daitada e bedelawo ona maei.**

**Ewanuau ema nuala teinedio dima e mai dewasaipona dewasailana.**

<sup>2</sup> Dima e eweile menaidaledia tane mai wadapona rua nuala pola waidasadia osowe wawaitane, onawa maene ita apana bosana. Tane nitu ipa e menaidaledia mai wadana rua, ipawa e mai nitu ema baiwa God iririsaipona, dia.

<sup>3</sup> Tane dima e menaledia baiwa God iririsanuno me mai iririla sipoasapie enalepi, dia! Ipawa e insaisala kadiwa mampe iririsailana ita nitu sa wadapono e ewanuau daitada osowe diasapona.

<sup>4</sup> **E tawo ewanuauwa daitada menaledia, sa ipa mai God do deaitipona, e ipa i ninala rua, ewanuauwa nambeido aleide. E ateiten, ba dia, tawo ewanuauwa daitada nuawadawadasanuna, sa ipa e God emalawoasaile adiananasailana. Apana mida tawo ema sowanasadia, me ipa God emalawoa apanawa.**

<sup>5</sup> E inseilana buka bedewe di wadi wadiase, “God Aleupa no nenena bedembo wandia no baimbaleidie obuleide.”

<sup>6</sup> Tane do God no sau amonawa euda debamawaida nenede. Buka bedewe girumalena wadi wadiase,

**“God apana segarantoie asowawantoia adiananamode. Tane me apana etepu obasa segarasiawaia sau amonawa euda wanamode.”**

<sup>7</sup> Sa baiwa e God atoweitonune simbiaitonuna, ita kadi mamba Seitan manlawolempo e mai waweitana, dia, tane enanabodano elepie alepi.

<sup>8</sup> **E God mampeitana ita God do e manla-**

**wolepi. E kadi dewalala witala mitana! E insaisala natamoile wainilana! E God nuawadawadasailana ita do tawo ewanuauwa daitada nuawadawadamoilana. Sa baiwa nuala mitane euitana!**

<sup>9-10</sup> E nuaeuitile ita oi wailana ene, tane kadiwa dewasalana baiwa nuapareitane keida wane God mampe dodomanaitana. Ita me atoweitane etela obasa simbiasanuno me wadaposilepio debamaitana.

*Mai sosola ewadabuamona!*

<sup>11</sup> Sumanai sosona, mai sosola wawakadikadimonona, dia. Me mida epe dewaleidia, ba sumanai sowa kotusadia, me ipa God anaanawa wadid-abuasade ita do ituaisisade. Naita e anaana ituaisisana, sa ipa e mai anaana ruawaitipona, tane e God anaanawa ansisisaiana.

<sup>12</sup> E eba inseiana abo e dodomanaida, sa baiwa soa kotusaa, ba? **Kotu apanawa dea os wande, me anaanawa ituno winede. Me os apana inamopia rua, ita do me os mampe muka winede apana kadimopi.** Tane e ebo dainea wade baiwa soa kotusaa baiwaitiana?

*Dima dewasana baiwaitilana mai asowa wana!*

<sup>13</sup> E bedelawo isiwa muba asou waie waiase, “Ande ba imonepi no bola debama emawo ba bola sawo antate sape ena dea wankasantata. Ita sape no sitoa debama dewasate manentata.” Ne dima wapaa baiwantedina asisudewaitana!

<sup>14</sup> E dima baiwa epe wailana? **E mai ateitipona imonepi dima segalepi, do inawala bedewe mai ateitipona.** E ipa unu wadio aupe gasu odedia rua. Gasu sa walama kerauda os

odedie tane tauwadea dialeide. Epe ruawa e inawala.

<sup>15-16</sup> E eba segaraitile asowawaitilana ipa kadi-waida, dewa ema ena! Ita ema epe wanuna: **“Naita no dima baiwantite inseitana God menasampa ita God no wadaitunepio inawaa wainenta dima no inseitana rua ando de-wasata.”**

<sup>17</sup> **Me mida dewa dodomana dewasapona insedie tane edia, sa ipa me kadi dewasade.**

## 5

### *Apana mauralala gagalou badowaida*

<sup>1</sup> E apana mauralala ne dima wapaa mampe insenadewaitana! Keida wane sidaitana, ipawa kadi rebareba e osolawo iepia baiwaleide.

<sup>2</sup> ✧E puraiwala uduudu kadintoputuwapu ita lalaa garala eubu natuiamopu.

<sup>3</sup> Tane silwa ita gold manlawo wineia ninintopue kadintoputuwapu. Ita ninintoiena sa e wawulepu kotu walama ompa osowe. Sa ipa puraiwala uduudu eba anatamolana baiwa. Ita nini sa baiwa God e matangelalepia ewaewawa ia idia bedewe etela uduudu ipituwapia rua. **Walama emawo e puraiwala adibamolano uarakadilen, tane no walama ompa osowe winetana. Dima baiwa e di adibakoaitile wainilana?**

<sup>4</sup> E nolala dewalala iraila debama bedewe nanala uwauwantoie auweia lagamole mai malesamopona, dia. Mo e manlawo momoduntone ke debama waieno Tatamba God mukamukaua eten.

---

✧ 5:2: Matiu 6.19

<sup>5</sup> E tawo osowe dewa uduudu mampe mauraitilana, ewanuau daitada nuala wadaidasano dewamoile wainilana. Enebobo walamawa, sa ipa God kotuwa walamawa, maidaleidio bedewe e eba etela dewasalano debamaidalen.

<sup>6</sup> E dodomana apanawa banlamolano kotu baiwa wimoiena ita e laga mampe otamole aimolana. Mo mai sipoa onantopona, dia, tane e di bomolana.

*Poka daitada bedewe badowa enontaa gagalowa*

<sup>7</sup> Sumanai sosona, **poka daitada bedewe nuala obasa aiaisiwa mampe simbaitonune wanlemo ideita Tatamba Iesu leulepie wisepi.** Irai apanawa eueuwa insena. Me iraiwa anditue aupe nuawa obasa aiaisiwa mampe onionialeidie wande, iraiwa bedewe nana ipawa eubuida teamopio tauma uwauwalepi. E insena me ambi walama uduudu nuawa obasa mampe onionialeidie wandia unu wapie iraiwa ampio inilepia baiwa.

<sup>8</sup> **Ema rua deawaa e Tatamba wisepia baiwa nuala obasa aiaisiwa mampe onioniaitonune ita poka daitada bedewe badowa enonuna. Tane mai etedabwaitana, dia, ipawa Tatamba wisepia walamawa kampalen.**

<sup>9</sup> Poka daitada etonune bedewe mai eda wawuitana ba eda momoduitana, God e do kotulepia sawa. **Ewane, kotu apanawa aitamana wisene du moape enede.**

<sup>10</sup> Sosona, e peroweta mida Tatamba ebowe gagalontoiena ruauitana! Mo poka daitada eteia bedewe mai etedabuantopona, dia! Tane nuau



obasa aiaisiwa mampe poka saiwa eteie sim-biantoie.

<sup>11</sup> ✧E ateiten, mo mida poka daitada bedewe mai etedabuantoipona badowa eneiena umanau etate inseitana, mo ipa sau euda wadeiena apanawa. Tane do apana Iob dudunawa insena! Me poka daitada etaidasadia bedewe mai etedabualepe sumanaiwa epona, dia. Do insena ambi Tatamba God ompa oshowe sau euda me oshowe itune une debamaia wanen, ipawa **Tatamba apana nuapareuleide ita mo mampo nuawadawada euwa dewasade.**

<sup>12</sup> ✧Sosona, dima ne gagalowalepa ipa debamawaida, sa baiwa asisudewaitana! **E mai uba mampe, ba tawo mampe, ba nitu da ebowa mampe kangoraitana, diaida! Tane e gagalola ipawa 'Oa' ba 'Dia' os wanuna. Naita, 'Oa', sa ipa 'Oa' wana, naita 'Dia', sa ipa 'Dia' wana.** Epe os wanuna, ipawa kangoraitana God e kotulepie wawula donsapi.

*Raupari ipa ipuipua mukamukaua*

<sup>13</sup> Apana da e bedelawo kadi donsampa, me rauparileipona. Tane e bedelawo sola dea nitu da nuaeuwalempa, me ipa sasalepie God ebowa wadaposisapi.

<sup>14</sup> ✧Ita apana da e bedelawo kero wadepia, me ekelesia apana eiau diamopio wimopue me rauparisapue ita Tatamba ebowa mampe mena etepa oshowe itupu.

<sup>15</sup> Naita mo sumanai mampe rauparintompa God mo iririu sipoasapie Tatamba kerolala sa

---

✧ **5:11:** Iob 1.21,22; 2.10; Sam 103.8      ✧ **5:12:** Matiu 5.34-37

✧ **5:14:** Mak 6.13

inasapio enepiwisepi, ita me insaisawa oauar-aleidia bedewe eulepi. Naita kero apanawa sa kadi dewasapona God me kadiwa insepidabuasapi.

<sup>16</sup> E kadila eda wawiaitane ita eda rauparitanana God inalepia baiwa. **Apana dodomana os God simbiasadia raupariwa ipa ipuipua mukamukaua.**

<sup>17</sup> ✧ Peroweta Elaia ipa apanaida no ruamba. Me nuawa uduudu mampe rauparilena unu mai wapi, ita uaboa 42 bedewe mai unu wapona, dia.

<sup>18</sup> ✧ Tane ema aupe me rauparilena unu wapona baiwa, ita unu wane irai butamono ininton.

<sup>19-20</sup> ✧ Sumanai sosona, e bedelawo sola da Tatamba intawa ulaipa epiiepie nambe alempo, tane sowa da banlepio inta dodomana euwa osowe wisepia, ne waeuwana ema wapo insena: Naita apana da me sowa kadi dewalala intawa nambe aleidia banlepio inta dodomana euwa osowe wisepia, sa ipa me sowa sa bolepe ia iikasalala bedewe alepona inasan. Ita God apana sa kadiwa uaraia dewamodia insadabuamopie riamopi.

Ne letana mape diasana. Niapo, euda e manlawo winepi!

---

✧ **5:17:** 1 Kin 17.1; 18.1   ✧ **5:18:** 1 Kin 18.42-45   ✧ **5:19-20:** 1 Pita 4.8

**Ina Sanaa Gagalowa**  
**The New Testament in the Kanasi Language of Papua**  
**New Guinea**  
**Nupela Testamen long tokples Kanasi long Niugini**  
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

---

PDF generated using Haiola and XeLaTeX on 18 Apr 2025 from source files dated 31 Aug 2023  
b27bd40e-e091-5268-bcbf-8232e1d7501a